

BAKE BIDEAN ADISKIDETU

Doinua: "Gure Jainkoak egin banindu"

Anai-arrebok, ondo etorri
danok Bolibar aldera,
behingoz alkarraz adiskidetu
nahi dogula agertzera.
Oi Ziortzako Ama maitea,
urten eiguzu bidera,
"Bake bidean adiskidetu";
zatoz guri laguntzera.

1

Egia egi bada ezin da
ez erosi ta ez saldu,
gizona gizon bada ezin da
inor guzurrez zapaldu.
Guzur-tratante askotxo dabil
hobe ondotik bialdu;
alde nahiz kontra, egia bada,
beti egia zabaldu.

2

Usteak uste, munduan ez da
inor egiaren jabe,
alkarrizketan bila ta bila
guztiok haren mirabe.
Egi osorik inok ez dauka
Aita santua bada be,
"Bake bidean adiskidetu"
ezin da egirik gabe.